

古
今
法
制

續文獻通考卷之四

皇明進士雲間王圻纂輯

田賦考 受納稅限

宋

寧宗嘉定八年八月權罷旱傷州縣比較賞罰

理宗紹定二年正月臣寮言乞詔諸路漕司嚴察屬縣丞簿依時過割二稅從寔銷注版籍違者按劾從之三年夏四月臣寮奏乞下福建諸路總漕倉司應被冠州郡合解諸司錢物比之常年期限並展一季六月臣寮奏乞戒飭二廣漕司嚴督所部州縣丁錢每歲覈寔見存之數造簿依條限前期發下催納銷注違者按劾

詔令吏部詳度于尚書省

寧宗時梅繫通判蘇州歲饑官貸種食已而督償頗急繫言借貸本以行惠乃重困民可乎奏請緩期輸之

金

章宗泰和五年三月諭宰臣曰十月民獲未畢遽令納稅可乎改秋稅限十一月爲初中都西京北京上京臨潢陝西地寒稼穡遲熟夏稅限以七月爲初八年十月御史田洵秀言方今軍國所需一切責之河南有司不恤民力征調太急促其期限痛其捶楚民既罄其所有而不足遂使奔走旁求于他境財殫力竭相踵流亡禁之不能止也乞自今凡科徵必先期告之不急者皆罷

庶民力寬而逋者可復詔行之

宣宗興定元年十月以久雨令寬民輸稅之限 元光元年上問向者有司以徵稅租之急民不待熟而刈之以應限今麥將熟矣其諭州縣有犯者以慢軍儲治罪九月京南司農卿李蹊言按齊民要術麥晚種則粒小而不足故必八月種之今南路當輸秋稅百四十餘萬石草四百五十餘萬束皆以八月爲終限若輸遠倉及泥淖往返不下二十日使民不暇趨時是妨來歲之食也乞寬徵歛之限使先盡力於二麥朝廷不從

元

世祖至元十七年命戶部大定諸例輸納之期分爲三限

初限十月中限十一月末限十二月違者初犯笞四十再犯杖八十

成宗大德四年冬十一月詔江北荒田許人耕種者元擬第三年收租今並展限一年著爲令 六年申明稅糧條例復定上都河間輸納之期上都初限次年五月中限六月末限七月河間初限九月中限十月末限十一月 十一年九月江浙饑中書省臣言請令本省官租于九月先輸三分之一以備賑給

皇明

國初秋夏稅糧每歲徵收必先預爲會計除對撥官軍俸糧并存留學糧廩給孤老口糧及常存軍衛二年糧斛

以備支用外餘糧通行定奪立案具奏其奏本內該云
爲徵收某年秋糧事該照在京并在外衛所官軍等項
合用俸糧擬合預爲會計徵收議得各司府州今歲該
秋糧除已對定官軍俸糧外其供 內府光祿寺等衙
門合用熟粳糯米芝蔴黃豆等項并五軍六部等衙門
官吏俸給優給故官兒男及太倉預備海運糧儲擬於
蘇州府等府各存收運納其餘秋糧存留學糧廩給孤
老口糧及撥奏各處軍衛倉收貯常存二年糧儲以備
支用如有糧多足用去處臨期定奪收支及該設糧長
去處委官一員率領該設糧長正身務要齊足定限七
月二十日以裏赴京面聽 宣諭關領勘合回還辦糧

凡徵收稅糧律有定限其各司府州縣如有新增續
認一體入額科徵所據該辦稅糧糧長督併甲首甲首
催督人戶裝載糧米糧長點看見數率領里長并運糧
人起運若係對撥者運赴所指衛分照軍交收存留者
運赴該倉收貯起運折收者照依定撥各該倉庫交納
取獲通關奏繳本部委官於內府戶科領出立案附
卷存照以憑稽考凡糧長關領勘合回還催辦秋糧
務要依期送納畢日赴各該倉庫將納過數目於勘合
內填寫用印鈐蓋其糧長將填完勘合具本親賫進繳
仍赴部明白鈐註如是查出糧有拖欠勘合不完明白
究問追理

太祖洪武四年令天下有司度民田以萬石爲率設糧長一名專督其鄉賦稅 十五年革罷糧長徵收糧令照黃冊里甲人等催辦 十八年令各該有司復設糧長以民戶稍多者充當 三十年又更置糧長每區設正副二名編定輸當 十九年令各處糧長暫於南京戶部宣諭給與勘合後遂爲例

宣宗宣德四年令江南府縣官督察各屬糧長凡有倚恃富豪交結有司承攬軍需買辦移用糧米假以風濤漂流爲詞重複追徵者重加究治 又令推陞郎中員外郎及御史長史等六員爲各部侍郎分投總督浙江江西湖廣河南山東山西等布政司并南北直隸府州縣

徵收稅糧 二年令各處解到秋糧折銀赴部出給長
單關填勘合送內承運庫收貯 三年令各處所差吏
於南京戶部關領糧長勘合畢卽以原賫本投南京通
政司轉送北京通政司類奏 六年令巡撫南直隸都
御史無理浙江嘉興湖州二府稅糧

景皇帝景泰三年令各司府州縣起運南京倉糧各委堂
上官一員總領 又令各處糧夫運頭於各倉納完通
關俱送本部驗過給付委官總領回繳方許管事 又
革湖廣所屬各縣正副糧長今里甲催徵 六年革江
北直隸楊州等府縣糧長 七年定浙江紹興等八府
重則官糧各存留本府縣上納如仍不敷於人戶冊江

田糧及中則官田重則民田內撥補 十三年奏准兩
京農桑夏稅納疋不及五十疋以上者俱送該府掌印
正官看驗堪中兩頭盡處俱用色絲間道填寫提調官
吏糧里姓名用印鈐記總給府批各另計開州縣納數
解納仍總取無欠長單備照 又今各司府州縣夏稅
農桑納疋務織造緊密厚重雙經雙緯除兩頭色絲長
二尺外淨織鈔尺長三丈二尺闊二尺每五十疋作一
束印封通寫看驗掌印正官於上責差額設官負通押
經收糧長大戶人等赴部交納 十四年戶部奏准河
南等布政司應天順天南北直隸等府州部糧官俱限
年終到部二月以裏納完過違限期事完之日送法司

究問 十五年議准各司府起運稅糧三千石以上州縣係全設者差佐貳官裁減者差首領官各一員部運直隸府州并布政司所屬府州仍差通判判官以上官各一員分管部運布政司照舊堂上官一員總督不及三千石者革去州縣委官錢糧責付該府州委官帶管世宗嘉靖元年令安陸州并京山縣民田秋糧自本年爲始停免起運兌軍花絨祿米俱作存留支用別府州縣原派藩邸祿米照數改補起運兌軍花絨祿米原額之數 八年令內外各衙門倉場一應糧料草束除納完官單外其扣下餘銀責令本大戶解部專備各倉場缺乏遇有糧料價錢科道等官召商糴買完日領價數及

扣過餘銀陸續備行司府州縣知會除扣留餘銀已足
下年該派之數行各免徵一年未足數者徵解補 九
年題准浙江溫台處三府稅糧照舊徵納本色不許巧
立餘米名色追徵害民 十年題准川廣協濟貴州錢
糧比南北直隸江浙山陝解運京邊倉糧事例定委府
州縣佐貳官員部運就限年裏赴各該倉庫上納每年
先將委官及掌印管糧職名開報候通查勤惰完欠自
叅政叅議而下一體奏請旌獎効治 又令今後行取
給由官俱送戶部查對錢糧完納明白方許收選復任
又令河南少派鳳陽倉夏麥每石徵銀四錢解鳳陽
府收貯折放 十二年題准浙江金華府京折銀兩減

數過多將杭州府數內三千石嘉興府數內四千石湖州府數內六千石共一萬三千石改派金華府以均民力 十五年令山東布政司每年將額派軍屯民糧解赴德州常盈倉上納聽戶部委官監督收放該州并德左二衛官吏旗軍等俸米月糧如遇災免該另行支補者造寔支文冊一樣三本呈遞委官查明一本存留一本發倉一本轉送該司查照補給不許私兌 十六年題准今後直隸山東山西河南等處原派納萬全都司宣府等二十一衛所并萬億庫隆慶衛倉涿州庫德州常盈庫折銀布疋每疋折銀叁錢解部轉送漕收貯 十七年詔各處衛所官舍餘丁人等置買民田一體坐

派糧差不許抗拒違者奪田入官 又題准山東青州府樂安縣踏出退灘堪種地三十二頃一畝四分撥入佃種照畝起科辦納稅糧一百七十一石二斗七升四合九勺絲綿二十八兩八錢一分二厘六毫馬草二百二十四束十四斤十四兩四錢照數徵收存留本處應用候會計之時添入該布政司定徵總額分派存留倉口依時徵納 十九年題准今後司府起解兩京各部各邊一應錢糧俱赴巡撫衙門掛號定限回銷每年兩次奏報上半年七月終下半年正月終備將坐派硃語并各項錢糧數目官解人等姓名領解月日開立前件奏行各部查考內已有完取獲批單者陸續註銷違限

未到仍行撫按官追併家屬批單獲日踈放若有侵欺
花費未完行提正犯到官查照律例從重問擬變產追
賠發落 二十年 詔各布政司直隸府州縣一應大
小錢糧坐派所屬須要奉到各部題准勘合方許遵行
分派其未奉勘合分毫不許擅科如違事發重治 二
十三年題准應天江浦縣卅江田地該徵糧數比照海
門縣例改納輕則 又議准山西大同平陽等府稅糧
徵銀多寡不均今後每石各止徵銀一兩其不係 代
府祿糧州縣每石量加銀一二分以補原額不敷之數
二十七年題准平陽太原二府澤沁汾三州遠年停
徵地內查出堪種有人承佃地土減半起科以抵衝塌

拋荒之數餘剩銀米自本年爲始僉撥大戶一條鞭徵收銀兩解布政司收貯聽補 王府祿米災免不敷之用 二十九年題准浙江等處司府拖欠銀兩數多查照舊規選差戶部屬官催完五分者本部具題取回 三十二年議准河南山東額運荊州倉漕糧共二十四萬石內除六萬石照舊徵收本色外原折色四萬石每石折銀六錢其餘一十四萬石查照先年題准改折則例內十萬石每石八錢四萬石每石九錢通共折色一十八萬石行令二省徵收與同本色一併徑解荊州倉上納 三十三年議准延綏所屬糧儲酌處本色收貯以備不虞將鳳翔府定擬本色二分折色八分西安府

本色四分析色六分延慶二府折色七分本色三分漢
中府等處照舊折色解赴綏德州廣益倉交收 四十
二年題准南直隸江西浙江湖廣各監兌主事合照先
年無催錢糧事例請給 勅四道仍會同各該撫按官
將四十一年額派南直隸浙江江西湖廣四省錢糧及
開納事例并節年會議條陳等項銀兩其四十二年分
并帶徵三十六年分錢糧完者起解未完者嚴催候一
年滿日通算約以十分爲率未完四分者布政司掌印
管糧官俱降俸二級移咨吏部不許推陞追徵完日准
照舊支俸未完六分者俱照不及事例降一級起送吏
部調用未完八分以上者俱革職爲民其餘府州縣掌

印管糧官亦照此例監兌主事催督錢糧通以一年爲限查將未完錢糧應叅官照依前例分別叅奏以憑戶部議覆施行 三十八年二月留都以南糧不至軍士月糧缺乏遂鼓噪倡亂執殺戶部侍郎黃懋官自後復設總督糧儲以督率之總督者至遂請於 上嚴爲比限遂定違限者罪以五百石爲率已上遞加以罪故有罪至二三十名者納贖至百十餘兩民運病之

穆宗隆慶二年題准山西坐派大同祿米軍餉各將該省管糧大小官員聽大同巡撫節制查比分數一體叅奏又議准各處起解錢糧戶部更定格眼文簿式樣發司府州縣各一樣二本逐項完欠解納批收各照格開

填外本部又用連四大紙照依勘合掛號印發各省并南北直隸府州行令各州縣每年畫爲一十二格有閏月者又添一格每格將一月內徵完起解某項錢糧若干填註用印鈐蓋歲終各省執赴布政司及管糧道南北直隸赴各府查比完欠分數仍發收執其各府以所屬州縣各布政司以所屬府州縣各多寡之數計分格眼於一紙每府州縣各一格眼每歲終將查比過錢糧各完欠分數填註各格眼內用印鈐蓋仍照具由呈部查考凡陞遷行取給由朝覲各執此任內號紙格眼赴撫按衙門查明仍併公文投部查考司府州縣循環即用前格眼簿連文內開報起解數目月日倒換又令各

省直府州縣置立格眼循環文簿并號紙填寫各項已未完錢糧凡遇行取給由各執此投部查比 三年題准陝西布政司將臨鞏府屬原派該鎮民運自二年爲始改徵本色運赴蘭州管糧郎中交納另議轉輸 五年議准杭州府仁錢二縣官民田地山蕩間架稅糧均爲五則寧波府三則處州府一則湖州府照依原定四則至於大造黃冊當從舊存寔以備稽查惟各府寔徵冊內照議派徵 又議准遵化縣見徵五年錢糧卽改本色上納就作六年軍馬支用其本年應發年例銀兩戶部卽行扣除仍查各州縣錢糧如有隔年先徵者俱照例一體改納本色通候會計之日各鎮照數查扣年

例銀兩 六年題准將貴州所轄土司比照有司事例
自六年爲始如全完至七八分者獎賞不及數者戒飭
全欠者革去冠帶勒限追完 令陝西撫按備查 宗
室見種民田某府將軍中尉每位下見種某州縣某里
某甲某人田地若干應派歲糧若干共銀若干造冊呈
院印發各該府收貯隆慶五年以前拖欠者照舊追納
外自後如遇各府 宗室關支本年分祿米之時計其
應納稅糧銀兩按冊照數扣除年終造冊奏繳青冊送
部查考

今上萬曆元年題准廣西清出徭種占據田土除平樂荔
浦永安原係民田撥還耕種辦納賦役外其餘俱撥今

立土司募兵領種每名給田十畝其大小頭目酌量加
添三年後方行起科每畝上徵三升照原分屬縣上納
一應差徭悉行蠲免 又題准令以後各州縣見徵起
運錢糧俱要當年完報先年拖欠帶徵者每年限完二
分總計以十分爲率未完二分以上住俸督催未完四
分以上降俸二級督催雖遇行取陞遷俱不准起送候
完至九分以上方准開復原俸未完六分以上降二級
調用八分以上革職爲民朝覲官題叅俱照此行其司
府掌印管糧等官總計所屬州縣完欠分數一體查叅
又題准貴州所轄掌印督糧土流官舍并湖廣湘鄉
等縣查照完欠分數照例獎賞住俸降調二年令查節

年未完緊要錢糧應該完報者酌量地里遠近事體難
易各定立限期照限查銷 六年題准湖廣協濟貴州
糧銀以後照四川類解到例改歸該省布政司及糧儲
道徵完總解貴州交納年終冊報戶部只照協濟未完
分數查叅不必京邊總筭 八年題准行令各省撫按
委官查將浮糧州縣逐一沿坵履畝丈量如有歷年詭
寄隱漏及開墾未經報官令自首改正免罪仍給本主
領種納糧如首報不寔查出問罪田產入官有能訐告
得寔卽以其地給賞丈量完日將查出隱匿田地抵補
浮糧 二十八年正月傳奉 聖諭連年以來典禮陸
續軍旅煩興經費頗多以致帑藏匱竭朕心日夜勞思

加意節省前已有旨此財不在于官又不在于民盡歸
贓官汚吏之私囊致使國用不敷生民日乏且不忍加
派小民故准官民所奏稽諸 祖宗舊規各處添設開
礦抽稅乃取天生自然之利及經紀牙行之餘利權宜
以濟時艱少候足用自有處分何乃撫按有司全無爲
國急公之心各懷要譽阻撓之術意圖遮飾弊端職守
安在故今年例常賦遲延怠玩坐視觀望致悞國計好
生可惡本都當拏問治罪姑且罰俸一年爾該部職司
國計不能任勞任怨及至缺乏乃推委支吾其于大臣
之義奚存便查照舊例各省直內有見年并拖欠未完
應徵年例帶徵錢糧的即便行文立限上緊催徵解部

以濟急用其數目還指名具奏來看又諭近來計帑空
虛無可那借這各省直未完係國家正賦如有任意拖
欠國用邊餉從何處給已徵報完未解到的着各撫按
嚴查何人遷延有無侵欺分別參處仍作速催令依期
解部未完的分別新舊徵解仍查其欠多者住俸催徵
務要如數報完如再怠玩違限該撫按官與你部裡及
該科不時參處毋得朦朧庇護以誤國計又諭這國
用匱乏固戶部之責天下臣子亦宜同心共濟豈得坐
視因連年用兵原無經制錢糧通按的處應用者盡今
每年正賦係是額供小民豈不輸納只因貪官污吏巧
肆漁獵受私賣法致令收頭攬戶侵欺展轉沉埋容隱

不舉拖欠安得不多撫按司道食祿忘死養資待遷以
催徵爲苛刻縱奸爲寬大相煽成風通不叅劾及至催
討又推礦稅擾民圖遮飾弊職守何在你部既指名開
具明白擬依通行各撫按及管糧司道官都住了俸始
着策勵供職嚴督有司將在庫的立時解發限次年三
月內到部未徵在民的限六月內盡數解完方與奏請
開支帶徵的照數起解有違慢的該部從重叅處其貪
官污吏乘機攫取致令小民納一費二徒寔私囊無資
國計的着撫按官嚴訪的寔卽拏發追贓照例盡法處
治具奏不饒戶部查催拖欠上供錢糧上曰這厨料
等銀係上供錢糧豈容拖欠着各該撫按官嚴檄司府

州縣備查二十六年分已徵在官者勒限起解未完的設法督徵務要依限催徵完解仍查有無豪猾侵攬等項情弊從寔查明叅處以後各官但有未完錢糧的不許給由陞遷着爲例如有用賄鑽求及朦朧不遵的着該科指名叅處二月戶科李應策奏做積玩上曰錢糧大事豈容漫無稽考奏報奏來的又多潦草致使戶部無憑查覆豈成政體以後着通行各省將歷年正額及帶徵等項完欠畧節總數并經管官直姓名每各省總送冊一部進來備朕親覽仍照樣開造該部科查覆永爲定例如有怠玩不遵仍前肆意違慢的該科叅奏處治

京糧事例

太祖洪武間令各處官田糧折收鈔絹金銀綿苧布及夏稅農桑絲折絹俱解京庫收支 又令於蘇松等府秋糧內派辦 內府光祿寺等衙門合用熟粳糯米芝麻黃豆等項及五府首領官吏并九卿等衙門官吏俸米各撥定數目運赴各衙門倉內收支

孝宗弘治十七年令蘇州松江常州三府闕白綿布以十分爲率六分仍解本色暫將四分每疋折銀三錢五分解部轉發太倉收貯如遇官負折俸及賞賜軍冬衣不敷照例定每疋給銀二錢五分自行買用積餘銀兩候解邊支用

世宗嘉靖元年令 內府監庫凡解納錢糧驗看真正俱限十日之內完納違者聽巡視科道官參究 三年令內官監收受白熟糯米并粳米每正糧一石加耗一斗不許分外多收巡視光祿寺科道等官帶管訪察如有軍餘脚子內使內官人等似前勒索財物多收侵剋等弊聽各官拿問參奏 八年議准七年以前錢糧已徵解部扣留餘剩准作下年之數八年以後除 內府白糧照舊收本色每石加耗一斗蠟茶等料每百斤加耗五斤其餘糧料草束每年科道官斟酌時估悉令徵銀解部送赴太倉交收遇有缺乏召商照依時估納完領價 九年題准內承運等庫并各監局見積餘米足勾

三年支用不拘有閏無閏每年再減派一萬二千餘石
浣衣局米多人少量留粳米五十石餘聽本部查給附
進京衛官軍月糧 奏准直隸蘇松常三府起運內官
監白熟細米每石耗米二斗五升車脚銀四錢船錢銀
六錢白熟粳米每石耗米二斗八升車脚銀三錢五分
船錢糙米四斗貼夫糙米四斗七升供用庫酒醋麵局
白糧每石耗米二斗八升車脚銀三錢五分船錢糙米
四斗貼夫糙米五斗光祿寺白糧米每石耗米二斗五
升宗人府并五府六部都察院神樂觀等衙門本色糙
米每石耗米四斗五升中府糙祿糧每石耗米六斗五
升俱車脚銀四錢船錢糙米四斗貼夫糙米五斗浙江

杭嘉湖三府俱照此派納不許違例加增

邊糧總數

穆宗隆慶三年查過九邊主客兵馬錢糧數目

遼東原額馬步官軍九萬四千六百九十三員名除節年

逃故外實在官軍八萬一千九百九十四員名

原額馬七萬七千一匹除節年倒失外寔在馬四萬三

千八百七十五匹

年例主兵銀一十六萬三千九百九十八兩五錢二分

八釐二毫五絲客兵銀四萬兩

薊州原額馬步官軍十萬九千三百九十員名除節年逃

故外寔在官軍九萬九千二百四十六員名原額馬四

萬一千三百二十一匹除節年倒失外實在馬三萬四千三百二十八匹

年例主兵銀一十六萬五千七百三兩三錢八分客兵銀六十三萬三千四百七十九兩二錢七分一釐一毫二絲

宣府原額馬步官軍一十五萬一千四百五十二員名除節年逃故外實在官軍八萬三千三百四員名

原額馬五萬五千二百七十四匹除節年倒失外實在馬三萬二千四匹

年例主兵銀一十二萬兩客兵銀二十萬五十兩

大同原額馬步官軍一十三萬五千七百七十八員名除

節年逃故外實在官軍八萬三千八百一十五員名

原額馬五萬一千六百五十四匹除節年倒失外實在馬二萬三千一百七十七匹

年例主兵銀二十六萬九千六百三十八兩客兵預發欽買銀八萬兩添發銀六萬兩

山西原額馬步官軍五萬八千五百二十六員名除節年逃故外實在官軍四萬七千一百八十一員

原額馬三萬六千二百九匹除節年倒失外實在馬二萬四千三十四匹

年例主兵銀一十二萬三千三百兩客兵銀十萬兩延綏原額馬步官軍八萬一百九十六員名除節年逃故

外實在官軍五萬一千六百一十一員名

原額馬四萬五千九百四十四匹除節年倒失外實在馬
二萬七千八百五十一匹

年例主兵銀二十四萬七千二百六十五兩二錢一分
客兵銀八萬兩

寧夏原額馬步官軍七萬一千六百九十三員名除節年
逃故外實在官軍三萬七千八百三十七員名

原額馬二萬二千一百八十二匹除節年倒失外實在
馬一萬三千八百九十二匹

年例主兵銀四萬六千二百四十五兩客兵銀二萬兩
固原原額馬步官軍七萬一千九百一十八員名除節年

逃故外實在官軍五萬五千二百六十七員名

原額馬三萬一百七十九匹除節年倒失外實在馬三萬一百六十三匹

年例主兵銀有閏月九萬一千二百六兩六錢九分無閏月八萬九千二百七十二兩三錢二分

甘肅原額馬步官軍九萬一千五百七十一員名除節年逃故外實在官軍四萬七千五百一十二員名

原額馬二萬九千三百一十八匹除節年倒失外實在馬二萬二千三百七十五匹

年例主兵銀五萬一千四百九十七兩八錢一分客兵銀無

歷年事例

成祖永樂十九年奏准宣府等處缺糧令法司囚人運糧贖罪雜犯死罪十石流罪八石徒罪六石杖罪四石笞罪二石

宣宗宣德七年奏准法司囚犯送本部通類差官押赴通州各衛倉支糧自備車輛運赴山海衛倉

世宗嘉靖四年令將嘉靖三年兩淮運司額鹽每引定價銀六錢嘉靖二年山東運司引鹽每引定價銀一錢五分俱開去寧夏召商上納米豆草束收貯緊要城堡以備客兵支用不許商人揀擇專中淮鹽遺下山東無人報納若本處時價高貴官軍月糧願領折色亦聽

銀兩相兼支放所開引鹽俱作年例外加增之數 六年令將兩淮 嘉靖五年鹽引每引定價銀六錢兩浙 嘉靖六年鹽引每引四錢長蘆六年鹽引每引二錢 山東六年鹽引每引一錢五分共鹽銀五萬兩俱作例外之數行陝西巡撫都御史分派緊要城堡定擬斗頭斤重召商上納本色糧料草束以備客兵支用 七年令於太倉銀庫內動支五萬兩并開中鹽引共銀一十二萬九千九百一十八兩二錢二分四釐運送延綏都御史又五萬兩并關中各處運司鹽引共銀九萬八千兩運送寧夏都御史處各交割內延綏銀三萬兩寧夏銀四萬兩俱准作 嘉靖九年年例餘俱作例外接濟

督令本鎮管糧等官候秋成糴買糧料或折放官軍月糧存積倉儲以備緩急 又奏准令各運司 嘉靖七年分開剩鹽引共該銀九萬八千兩送甘肅都御史分派緊要城堡召商上納本色糧料草束內除六萬兩准作 嘉靖八年年例之數餘銀三萬八千兩就聽本官會同屯政都御史查審見在極貧屯丁賑濟 十五年題准各邊年例鹽銀每年正月以裡查照常數奏差官解送該鎮交割乘時召買本色糧料分發緊要城堡倉分收貯永爲定規 二十九年題准各邊錢糧無分主客俱守巡道召買管糧郎中稽察奸弊

今上萬曆元年爲解運折色令陝西河州起運西寧倉秋

糧銀一千一百四十一兩二錢四分固原州倉夏稅糧銀一百六十二兩九錢二分五釐四毫九忽廣積庫夏稅一百五兩俱存留河州倉補給參將營軍士月糧支用將鎮原縣起運一條城堡倉秋糧一千六百兩內撥一千四百九兩一錢六分五釐四毫九忽以補西寧固原廣積各倉庫前項之數餘銀一百九十兩八錢三分四釐五毫九絲一忽仍作一條城堡倉徵解蘭州廣積倉上納仍各註實徵冊內以爲常額 又令蘭州一帶主客兵錢糧比照薊遼各鎮事規總屬郎中管理與臨鞏兵備互相覺察 二年令延寧二鎮并延慶二府一應主客兵馬俱屬延綏在蘭州洮岷靖虜平固諸處者

俱屬蘭州各管糧卽中無理凡遇出納召買該道掛號
定價卽中收放互相參考 九年題准添設密雲站軍
一千名該月糧銀五千九百八十兩除各軍原有月糧
布花等銀二千三百五十一兩二錢照舊奏支外尚少
銀三千六百二十八兩八錢每年于保定府存留支剩
稅糧銀內照數解部轉發易州鎮補給 十年題准保
定騎營新買完馬一千五百匹每年除在永平六個月
外春冬還至保鎮該添草料銀四千一百三十七兩七
錢五分自本年爲始于保定府存留支剩銀內照數動
支徑解易州鎮交收如在永鎮多支一日在易鎮扣支
一日不許彼此重支

輸納草料事例

英宗正統九年令刑部都察院問完囚人以四分爲率內二分納草贖罪其斬絞罪者納草一千八百束三流并徒三年者一千四百束徒二年半者一千二百束徒二年者一千束徒一年半者八百束徒一年者六百束笞杖者每十四十束每束重一十五斤十四年令陝西西安慶陽延安等衛府官吏舍人所犯不係贓罪笞杖徒流及軍民人等犯該笞杖不該立功者定撥各堡納草又令關中兩淮兩浙河東長蘆運司存積四分官鹽不分四品以上官員之家及軍民人等俱於在京西城等坊草場上納草束又奏准召商納草不分官員

軍民之家每穀草一百束官給價銀三兩禾草一百束二兩二錢就於京場上納

憲宗成化元年獨石馬營龍門所雲州四倉急缺糧料關淮浙長蘆河東運司官鹽九十五萬二千三百二十二引召商上納米豆至六年報中未完除兩淮仍令照舊兩浙等運司酌量時價改中草束十二年奏准大同等處各城堡倉場關中長蘆運司官鹽十萬引每引納料豆四斗河東運司官鹽二十萬引每引納穀草八束十四年令遼東二十五衛囚犯納草贖罪除答罪并真犯死罪及例該充軍等項并無力外其餘雜犯死罪納草三百五十束徒三年納草二百五十束徒二年納

草二百束徒一年納草一百五十束杖罪每一十納草
十束 又令戶部運銀十萬兩分送陝西榆林給與官
軍准折草料仍行山西河南附近州縣或借撥或僭運
或買辦料豆各萬石穀草各一百五十萬束俱納榆林
一帶各場

孝宗弘治十六年奏准遼東商販買賣之人務經巡撫官
查勘無礙方許於管糧郎中處納草價銀三兩五錢給
引掛號入關

穆宗隆慶三年令明智等坊五場草束及太倉黑豆俱係
京營馬匹及防秋支用各營馬匹草料每年照舊放本
色三個月其餘月分俱支折色如遇草料價賤全支折

色務令在場常有草六十萬束在倉常有豆三萬石以備接濟 又令商人買上草料科道同戶部司官會估價值定在十月正秋成之後草豆價值俱平山東河南二道但有現在銀兩權宜預支赴秋買辦 又令在京五場通計買草至二百萬束每年挨陳坐放照數買補行各場監督主事每年防秋畢日查將京營馬匹草束照例於十月十二月次年二月支放務在出陳易新其餘月分照常折放仍於本色支放完日呈部以憑酌量坐買務要各場貯草束一百五十萬以備緩急支用

支給草料則例

太祖洪武十三年令廣東廣西福建浙江湖廣江西布政

司淮安蘇州等衛馬草不許科收馬料不許支給

成祖永樂七年 欽定征操馬匹關支草料公六匹侯五匹伯四匹指揮千百戶各一匹征進馬匹草料公十匹侯伯八匹都督六匹都指揮三匹指揮二匹千百戶各一匹非征進之數不許關支 十一年令上直馬每匹日支料豆四升草一束其下場牧放馬匹止關料豆一月 十四年令馱豹馬日支料四升草一束自九月初一日起至十一月終止 二十二年令常川上直馬每匹日支料三升草半束餘半束折支鈔二貫騎操等項馬每匹日支料三升草一束折支鈔四貫

宣宗宣德五年令御馬監勇士馬并達官調習馬每匹按

月原支草三十束內支本色草一十五束餘折白綿布一疋

英宗正統二年令五軍三千神機等營操備官軍馬月支料上九斗添與一斗以後照舊關支 又令陝西寧夏等處官軍騎操馬每歲自九月半起關支料且至次年四月半住支 又令大同宣府等處操備巡哨馬每月原支料豆九斗添與三斗至次年三月半住支 四年令大同宣府鎮守總兵等官凡馬匹不係官給之數不許關支草料 六年令北虜使臣馬駝初到京每匹日支草半束一月之後又添半束每日仍支料一升 又令甘肅操備馬料自十一月初一日至次年三月終日

支四升其九月下半月及次年三月四月上半月仍照舊日支三升 八年令直隸真定衛達官自己馬草料住支其官馬照官軍例支給 九年令萬全都司巡哨操備馬添支四月下半月料豆六斗 十年令甘肅莊浪等處官軍馬料日支四升外添支青稞一升 又令大同右玉林等衛官馬月支穀草十束與自備野草相無喂飼 十四年令各處馬房上直騎操并起取等項馬草每一束折支銀二分 又令居庸關騎操馬自十月十五日起至次年四月半止每馬一匹日支草一束 又令五軍三千神機等營騎操馬自本年十二月二十五日起至次年二月終止每日加料豆一升

景皇帝景泰元年奏准 長陵等三陵神宮監長隨內使
領到御馬監馬驢行今昌平縣每馬一匹日支料三升
草一束驢一頭日支料一升草半束每年十月初一日
起三月終止如有事故截日住支 二年奏減上直馬
料豆一升與五軍等營騎操馬一例關支三升 令五
軍等營騎操馬自十月十五日起本月終止每馬一匹
給銀一錢十一月給銀二錢買草十二月至次年正月
終止每馬關本色草一十五束 三年令減給駃豹馬
料豆一升照例自九月初一日起至三月初一日住支
又令五軍等營存操馬至六月青草長茂止關料豆
草束住支至十月初一日起草束依例關支 七年令

寧夏等衛馬隊旗軍照甘肅例每歲九月十六日起至
次年四月十五日止日支料豆三升 又令勇士小廝
馬月支料豆九斗草三十束

英宗天順二年令新降達官每人准馬一匹月支料七斗
草三十束

憲宗成化元年奏堆凡內外鎮守官負馬不拘官私止給
四匹草料 五年令京營官軍草料俱編填勘合方許
支給 十二年令原選聽征下場馬預先調取來京每
匹於九月十月支草二十束九月以後仍有邊報却將
十一月分該支草料移在十月分十二月分移在十一
月分接續照例秋草穀草兼支間月折與價銀買草

十三年令下場取回聽征官八月九月每馬一匹按月支與草價銀二錢三分 十七年令聽征官軍馬一萬五千匹每匹月給草價銀一錢日支料豆三升續因馬匹瘦損添給草價銀一錢 二十年奏准聽征馬四月五月每月添給料豆二斗轉前九斗共支一石草價銀三分轉前二錢共支二錢三分 二十一年令永平山海薊州等處三屯等營官軍騎操馬按月造冊三月關支料豆十月折支草束

孝宗弘治二年令各營騎操馬本年十二月至春季內一月每匹月添草價銀一錢以後該支月分仍舊 又議京營存操馬每年四月分關支料豆一半其餘下場回

還馬每年關支折草銀兩月 六年令存操馬四月分
料豆准與全支 十二年奏准存留下場聽征馬自五
月初一日爲始除料豆照常外每馬折給草價銀二錢
內存操馬先已支過者照數扣除候聲息稍緩仍令下
場收放草料住支

武宗正德五年令各邊鎮巡等官凡遇出哨征戰追趕之
日馬匹每日量加料豆二升閒息之日照舊明白造冊
開報

世宗嘉靖元年奏准涿鹿左衛興州中屯衛守操舍餘常
川聽候捕盜原領馬匹春季正月二月冬季十一月十
二月按月於涿州良鄉倉支給草料其三月至十月

八箇月聽其自行牧放事寧停止 二年令在京各營
除騎操馬匹照舊每年支本折草三個月料豆間月本
折兼支聽征馬匹俱令下場牧放草料截日住支 六
年令捕盜馬匹准給與折色隨便糴買喂養 七年奏
准馬匹草束每年照舊支三箇月本色其料豆存操馬
每年十二個月聽征馬除下場六個月俱本折間月關
支 又奏准委官主事將榆河居庸榆林土木四驛查
照先年定例每年自十月初一日起按季關支料豆九
斗草三十束夏秋住支聽其照舊打采青草喂養其榆
河居庸二驛冬春仍關支本色榆林土木二驛冬春馬
草准改支折色每草一束給銀二分 八年題 御馬

監馬 朝馬賞名馬爲一等查照舊例喂養雜料馱鞍
選記披甲馬爲一等內除豌豆止用大麥菜豆黑豆喂
養其各起騎操馬等項馬爲一等內除豌豆菜豆止用
大麥黑豆喂養 十年題准四月青草長茂各營馬匹
照舊規盡令下場放牧 十四年題准崔黃口營守禦
操脩軍餘民壯騎操官軍口糧黑豆通州倉關支草束
除夏秋二季照例牧放不支外冬春二季自嘉靖十三
年冬季爲始每草一束折銀五釐坐派太倉銀庫關支
自行買辦 又題准各營馬匹除東西官廳存留聽征
馬每年自四月初一日起至九月終止全支料草以備
調用外其奮武等營存操馬匹遵照舊例不支草束止

關料豆本折間支 二十九年令三大營馬匹每年夏
秋六個月差官領 勅於近京地方隨便牧放以備調
遣春冬二季除三個月支本色外其餘三個月應支折
色月分草每月折銀三錢料豆折銀五錢其夏秋二季
草料價賤係在管存留操備馬匹止照常規折支不許
驟援爲例 三十二年令鞏華永安二營原充馬匹草
料夏秋月分該支折色每豆一石折銀三錢五分草三
十束折銀二錢五分冬春月分雙月支給本色單月折
銀豆一石五錢草三十束三錢閏月在春冬時本折中
半在夏秋時依季支本折 三十三年令大同鎮主兵
馬匹每馬計冬春六個月月支料豆九斗舊支本色四

斗令加二斗共六斗餘三斗照舊折色其草東夏秋采積以備冬春不許支

秋青草事例

成祖永樂九年令天城陽和等衛所采取青草給大同都司官馬以平陽澤潞等府州縣草納附近驛站

宣宗宣德四年令行在五府屬衛所錦衣等衛順天等府所屬州縣各起倩軍餘人夫采取秋青草運赴京場及在外驛站收貯備用其山西河南山東陝西四布政司所屬驛站并有操脩馬衛所行各布政司都司量派軍夫采打秋青草就本處收貯聽支

英宗正統十一年題准延綏一帶衛所自定邊安邊營西

抵寧夏花馬池東至府谷縣大小營堡水草便利可以
牧放每年摘撥軍旗餘丁自行牧養馬匹

景皇帝景泰元年奏准西湖并城濠草俱令戶部借撥軍
民人等采取備用不許諸人私占 又令陝西寧夏甘
肅延綏山西大同并偏頭雁門二關遼東萬全都司所
屬及直隸山海永平密雲紫荆倒馬居庸一帶沿邊關
口及山東備倭處所馬草總兵鎮守及管糧卽中布按
二司等官於秋草長茂之時量起軍夫趁時采取每束
重一十五斤設法堆積委官看守以備支用 三年令
南海子大木廠西湖并城濠內青草戶部差官督同各
城兵馬司委官率領弓兵并當坊火甲時常巡護至期

行取給撥官軍采打搬運京場

英宗天順三年令甘肅莊浪沿邊十三衛所官軍餘丁舍人各采草一百五十束堆積備用不許官豪勢要占據近地肥饒草場其平涼等府原派地畝穀草每束折收銀二分運送邊城以備買草支用

憲宗成化二年令陝西都行二司各衛所軍士餘丁不該輪班在營者每人采草一百二十束各於官場上納各驛及遞運所馬牛夫甲軍每人八十束俱於本驛遞上納三年令遼陽廣寧等軍衛趁秋青草牧放馬匹不許指以征操爲由擅支官軍堆積草束九年令延綏寧夏各堡馬步軍餘采草十一月終不完者本堡把總

官住俸年終不完者管糧叅政及監收副使等官住俸
孝宗弘治十五年令遼東秋青草年例之外加添一倍每
七束給與鐮刀工銀一分其金復等衛軍餘折銀草束
仍納本色若鎮守等官將草場立標采打壓賣各衛索
受銀兩許撫按劾奏其宣大陝西榆林迤西一帶邊鎮
軍衛屯堡生草去處一體施行大同青草不俟挨陳先
行放支

武宗正德三年奏准遼東廣寧右屯等衛照舊采青草不
必給刀鐮價銀每名二百束量加添三十束金復蓋三
衛每名折銀一兩六錢照舊銀布兼收通送管糧衙門
以備買草糴糧支用

世宗嘉靖三十一年令居庸榆河榆林土木四驛馬匹冬春照舊給與料草夏秋牧放仍派秋草八十束責采打
之場交收支給

今上萬曆七年題准明智等草場委官收放草束差滿一體考覈公勤廉慎者優錄平常無過者復職叙遷怠玩貪求者照罷軟不及不謹等例分別降黜 又令象房倉官攢必將經收草料收支盡絕方准起送其守支月分仍給俸糧 九年題准西城坊草場歸併安仁坊帶管北新草場并司牲司歸并明智坊帶管牛房倉歸并黃土倉金盞倉歸并壩上倉渾石橋倉歸并南石渠倉各帶管空運一差歸并通州草場主事兼管其書筭皂

隸人役一并裁革 十二年題准順天府壩上等倉共
草七萬九千六十一束每束原折銀三分五釐今量減
五釐又太倉銀庫草二十七萬八千五百八十四束每
束原折銀三分五釐今量減一分通共減銀三千一百
八十一兩一錢四分五釐自萬曆十三年爲始照減數
徵解

查盤職官

今上萬曆元年議准山西屯田僉事移駐應州專管山西
三關大同一鎮屯務兼渾應山場北樓營伍各軍民田
地 又令蘭州一帶主客錢糧皆屬郎中管理凡出入
糴買糧草先于臨鞏兵備道掛號定價候郎中發銀收

放 二年鑄給監收肅州倉臨洮府帶街通判固原州
倉平涼府帶街通判靖虜甘州涼州莊浪西寧洮州六
倉鞏昌府帶街通判監收永豐倉同知各關防 又給
昌平管糧通判關防今無理居庸關商稅 又題准查
盤邊儲着各該巡按御史帶查不必另差 又鑄給監
督徐州淮安臨清德州天津關防 五年題准各邊糧
郎中有缺于員外主事內擇其才守素優資俸相應者
充任俱候三年滿日預呈戶部移咨吏部選補一員前
往交代將任內經手錢糧逐一交盤明白回部聽候考
察中間果有廉能勤慎有裨邊儲者另行優錄其怠肆
不職者查訪得實不時議處 七年題准通行南直隸

并浙江江西湖廣福建廣東廣西四川雲南貴州山東
河南督撫查將軍餉照各邊事例定爲多寡經制每歲
御史照數查盤年終督撫開具原額收除實在及省存
數目奏報 又定車戶車脚在京東倉每石給銀一分
五釐西倉每石給銀二分一釐通州西倉西門南倉北
門每石銀一分一厘西倉南北二門南倉東門每石銀
一分中倉三門每石銀七釐 八年裁革蘇松管糧叅
政一員 又裁革山東河南京糧道叅政二員 又裁
革山西屯糧叅政山東督糧叅政河南督糧叅議廣東
管糧叅議貴州督糧叅政廣西管糧叅政福建督糧叅
政四川督糧叅政雲南督糧叅政各一員其糧務歸併

右叅政管理 又題准通行撫按凡查盤錢糧選委府佐等官親赴地方盤驗以後各邊盤收監放盡責通判不許復委經歷如倉攢侵盜事發通判即不知情亦以不職論黜 九年題准臨清天津等倉委官三年一次盤驗明白即將官攢照例起送免其守支 十一年復設山東陝西督糧左叅政福建山西督糧右叅政各一員

內外各倉禁例

今上萬曆十二年議准 內府錢糧及內外倉場糧草各處軍需等項不拘起存但有包攬誑騙銀一百兩糧二百石以上不行完納者照弘治十三年例問發

行糧馬草

孝宗弘治十八年 今如有出戰夾帶私馬及虛報馱馬者聽巡撫管糧官責將冒支軍人問擬侵盜官糧罪名武宗正德七年今動調京邊官軍照依支給糧料草束其各該存操官軍必係總督提督官會調隔別地方截殺方許支給若本處防守本等月糧外不許妄支

世宗嘉靖二年議准南京倉糧缺乏戶部轉行徽州等府新安等六衛上班官軍行糧自本年七月爲始俱在徽州等府關支折色就行管軍官通領到京按月支給候積有京儲之日另行議處 十一年題准沿邊各鎮從征軍士遇敵戰守及緊急哨探者行糧每日加給五合

十三年題准總兵官遇有聲息出邊按伏截殺之日
先將人馬數目造冊用印信明文送撫按巡關衙門及
管糧郎中處方許動支行糧馬草其原支月料截日住
支事完照舊 二十八年議准四川湖廣征調土兵行
糧照官軍例日支一升五合願支本色者月給米四斗
五升支折色者給銀二錢二分五釐 二十九年題准
密雲馬蘭谷太平寨燕河營四路墩軍俱以防秋爲始
自每年七月起至十月止計四個月每名每月添支行
糧二斗及將馬蘭谷等三路夜不收行糧亦照密雲一
路每名每月再添一斗連前共支三斗 三十一年題
准大同掣回班操官軍照舊分爲春秋二班每名月支

行糧四斗五升照依寧武官軍支給事例每石給銀六錢三分 三十二年議准三關鎮把總等官及跟官旗牌務遵弘治二年例如遇征調出百里之外把總若係都指揮支廩米三升領軍頭目不分指揮千百戶并旗牌官日支行糧一升五合事寧截日住支其各邊鎮主兵馬匹俱有屯田草場足以自給今後各巡撫清查責令各軍夏秋趁時牧放仍會同總兵官將年例秋青草束派軍採辦運赴該場上納以脩冬春支用其民納召買草束止脩客兵支用不得一緊糜費 三十三年題准蘇松浙江禦倭將士除百里內月糧自給外其餘征行調集百里外總兵叅將守脩都督都指揮等官日支

米五升千把總署都指揮等官日支米三升管隊官不
分指揮千百戶并旗軍俱日支行糧一升五合馬匹俱
料三升草一束如本色數少查照時價量折銀兩總兵
叅將守備所部軍馬外有奏帶負役依例支給不許假
以家丁冒費 三十四年議准薊州密雲昌平一帶官
軍征調遣出百里之外者准全給行糧五十里以外者
係防秋之日果有賊勢壓境晝夜擺守間日一支若稍
緩及非防秋之日即行停止五十里以下者離家不遠
着令自脩糧餉不准支給若果與賊對壘相持事勢急
迫不能供送間支者暫准全支不支者暫准間支賊退
即止 又議准馬匹除防秋四個月草料外五月六月

每馬各月給貼料銀三錢十一月至四月照例料豆本色四斗折色五斗草每月給與十束又題准延綏客兵行糧賊至百騎踰日不退雖在百里之內亦聽支給三十六年題准京營并標下人馬選用火器手每軍每月月糧之外隨倉各支口糧二斗待練成歸營之日仍舊額止支本等月糧四十二年題准薊遼曹家寨軍士專隨遊擊操練與別項班軍不同今照客兵行糧則例每月支米四斗五升四十三年議准薊遼各總兵官標下馬匹凡遇出征在夏秋六個月內支過行料回營免其扣除若在秋冬六個月內既支行料不許重支月料各營有馬官軍春季三個月每月給草三十束

照例每束折價銀一分七釐遇有出征支給行草亦令
截日住支 四十四年議准薊鎮牆石古北三路地薄
人稀每軍每月准支行糧三斗下班住支 又題准薊
遼鎮所屬沿邊城堡哨守夜不收墩軍額數每名月支
行糧二斗

穆宗隆慶二年題准薊遼巡撫新募軍馬自二年正月爲
始照例一體給行糧草束本折兼支 三年題准各邊
防秋事規自八月以後各邊應用軍夫逐一查明暫於
主客免調省下兵餉銀內量行支給行糧 五年題准
薊永昌密四鎮兵馬調遣百里之外者全支行糧草料
五十里內外查照原題有無晝夜擺守與賊對壘分別

支給如係平常不許一槩濫支 又議准新選通州五
衛軍士照常支米八斗若遇調遣一體關支行糧其新
領馬三百匹比照舊馬二百匹事例每年春冬二季止
給料喂養 六年議准三關秋防各營馬匹每月原額
料豆九斗照依彼中時估准各給折色止許一月若遇
有征調例當支給行糧料草不准折支

今上萬曆七年題准中都河南山東三都司班軍行糧每
班各給本色三個月折色三個月俱以到京實數實日
造支

預借

宋

理宗淳祐五年八月詔申嚴預借重催取贏抑配之禁今
監司覺察毋害吾民 八年監察御史兼崇政殿說書
陳求魯奏本朝仁政有餘而王制未備今之兩稅本大
曆之弊法也常賦之入尚爲病民况預借乎預借一歲
未已也至於再至於三預借三歲未已也至於四至於
五竊聞之州縣有借淳祐十四年者矣以百畝之家計
之罄其永業豈足支數年之借乎操縱出於權宜官吏
得以簸弄上下爲姦公私俱困臣謂今日救弊之策其
端有四爲宜採夏侯太初併省州郡之義俾縣令得以
直達於朝廷用宋元嘉六年爲斷之法俾縣令得以究
心於撫字法藝祖出朝紳爲令之典以重其權遵光武

擢卓茂爲三公之意以激其氣然後爲之正其經界明其版籍約其妻費裁其橫歛則預借可革 紹定中泉州諸縣二稅嘗預借至六七年真德秀知州首禁之六年四月監察御史李日邁奏預借苗稅當罪官吏不當責民戶詔令戶部詳度上于尚書省

金

世宗大定二年有言以用度不足奏預借河北東西路中都租稅上以國用雖乏民力尤艱不允

元

成宗大德十年駙馬濟寧王蠻子帶以所部用度不足乞預借歲得五戶絲從之

文宗至順二年九月以鈔五萬錠及預貸四川明年鹽課鈔五萬錠給行樞密院軍需

皇明

國初那借錢糧律有明禁惟京邊缺用偶一借支

世宗嘉靖中兵部尚書楊博奏在京衙門缺柴薪銀兩動於太僕寺馬價借給許之已而差武庫司主事萬廷言往河南山東北直隸等處查催柴馬銀兩補還 丙寅秋九月發太僕寺馬價銀四千五百兩給賞壽清等宮做工官軍時大修官及官軍承役者缺食兵部尚書楊博奏乞移支遂有是命 二十三年南京供應機房織造 上用紵絲紗羅織金彩裝膝欄襴暗花五爪龍

共一千一百二十五元該絲料金條紅花等物及織染人匠工價等共銀一萬七千八百七十八兩有零時工部請於應天府貯庫後湖贖罪銀借支許之已而給事中游震得奏稱所貯銀兩已經戶部題作發邊應用之數續又覆題爲地方亢旱米價高貴該本部坐擬前銀存畱在庫聽候巡撫都御史丁汝夔領回發賑臣等看得織造事干上用備賑事切民惠况具奉有前欽依誠難以此廢彼臣等該候覆請明旨至日欽遵施行而該部執以稽誤上用事理緊題請往返動經月餘隨查蕪湖抽分廠應還前銀纔止解到一千兩除行該部查催蕪湖銀兩前來接濟外臣等權宜區處暫

于本湖項下堪動餘銀數內一面借用七千八百七十
八兩二錢八分九釐有零給發織造其戶部原坐存糧
備賑一節除將數內見在萬兩存貯外亦行查催蕪湖
合還銀兩解補足數再照南京工部所借該銀一萬七
千八百七十八兩有零今蕪湖合還銀兩止有一萬五
千尚欠二千八百七十八兩有零合行南京工部另議
處補以足織造之用又奏云查取本湖項下堪動銀數
括刷頗嚴今扣所存止銀三萬八千餘兩見在修理冊
庫重大工役無今大查歲用不貲動支分欸扣筭已覺
不敷今後本湖銀兩非候日久積餘不許輒擬支借庶
幾財用足而事濟矣

今上萬曆二十二年戶部奏准雲南巡撫陳用賓咨稱緬
夷侵犯蠻莫等處大兵雲集帑藏空虛餉難接濟要于
四川省量發銀二十餘萬協濟軍需一節爲照滇南地
方緬賊侵犯提兵征勦勢不容緩若使餽餉不繼軍士
枵腹何能禦敵今該省帑藏空乏撫臣告急冀請川省
銀兩速來協濟似非得已第四省向困西事搜括已多
近又動支十萬餘兩抵充甘寧二鎮年例竊恐積貯無
幾該省亦屬用兵之會難以再行請發但克頑突犯事
在燃眉而別省路途賒遠又不便解運相應移咨四川
巡撫都御史及咨都察院轉行四川巡按以文到日即
將該司庫貯堪動官銀那借一十萬兩差官解赴雲南

布政司交收出給庫收回文銷繳仍待兵徹歲稔之時
照數補四川不許拖欠此外兵餉聽滇南撫按官設法
濟處川省仍將解過銀數報部查考隨奉 旨這銀已
減去原請一半之數着上緊發去事寧之日補還地方
用兵事各該撫按官當并力共濟不得自分彼此還行
文與他 二十八年二月戶部覆福建巡按御史張應
揚奏報軍餉數目奉 旨該省軍餉既經勘明確准其
開銷以後一應錢糧着布政司置立循環二簿通詳撫
按會核動支若有虛冒情弊據實奏如歲月不敷務
宜悉心多方措處以足餉額不許年年借支但爲苟且
目前之計 二十九年四月廿六日戶部奏庫藏十分

缺乏請借支太倉銀十二萬七千兩接濟延固等鎮
二十九年十月工部奏大禮錢糧緊急乞准那借部銀
以完造辦以濟吉典恭照冊立冊封 國家大典一應
鋪設錢糧自宜速行造辦聞 命之始即當差官咨給
勘合分投前往南京浙福江湖兩廣山東河南等處守
催各項銀兩候用緣路程遙遠水陸未便計期數月方
可到部乃今內官等監銀作等局傳造大禮錢糧數十
萬餘此萬分緊急刻日告成本部司銀兩除目前催到
兵部協濟銀六萬兩外其餘一時艱措欲待守候解到
恐致遲悞造辦查兵部收貯班軍月糧銀或于太僕寺
收貯馬價銀兩內准借二十萬兩過部先行買辦物料

以濟造作仍候各省直解到事例銀六萬兩湖廣荊州
抽分應解銀二萬兩南京工部應解代造器皿銀二萬
兩以上十萬見今差官守催不日解到料銀陸續補完
數所據班軍月糧馬價亦係該部正供似難輕議但查
該寺收貯不過爲京邊預備非數月之內卽發應用亦
非數月之內盡行解發者必有留貯在庫似可通融暫
借若數月之後卽有催到解補亦不過一轉移之間而
在彼仍有預備權宜之計莫甚于此 上以太僕寺亦
係京邊備用之需難以輕借先行酌處着借十五萬應
用你部裡還催備各省直應解銀兩補還不得久逋失
信

代輸

宋

寧宗嘉定間彭方宰歙太守袁甫賢之發郡帑五百萬以佐惠政方悉以代輸下戶折斛之額

理宗端平初趙以夫知漳州初丁米錢久爲泉漳興化民患趙以夫請以廢寺租爲民代輸詔可其奏袁甫并捐三郡歲解本司錢二萬七千貫助之

元

憲宗時命阿藍答兒劉太平會計京兆河南財賦大加鈎考其貧不能輸者帝爲代償之時董文炳以父任爲藁城令縣貧重以旱蝗而徵歛日暴民不聊生文炳以

私穀數千石與縣代輸大寬民力 中統三年東平嚴忠濟向爲民貸錢輸賦四十三萬七千四百錠借用課程錢本隨課銀萬五千餘兩詔弗徵 至元六年四月勅真定等路旱蝗其代輸築城役夫戶賦悉免之 十四年五月詔免民代輸簽軍伐木夫戶賦稅 十五年秋七月濟南總管張宏以代輸民賦嘗貸阿里阿答赤等五百五十錠不能償詔依例停徵

文宗至順元年十月徵河南行省民間自實土田糧稅不通舟楫之處得以鈔代輸

皇明無

支移折變

宋

高宗紹興時蔣允濟爲賓州倅攝昭州先是官出錢二百予民輸布一疋復折布爲錢十倍取之允濟疏聞歲減其半路彬爲廣西提刑時韶州夏稅折布太重民甚苦之彬上奏乞蠲減欲於見納價上三分損一每疋折錢一千詔從之民受其利

寧宗嘉定中任良弼知休寧請本縣折帛一項減三分之一詔從之

理宗寶慶元年十月知紹興府汪綱奏會稽攢官所在稅賦盡見折科山陰同應辦之勞乞照會稽除免詔權免三年十一月幹辦諸司糧料院趙彥覃進對奏州縣

折色病民上曰纖悉如此殊失愛民之意宜速處之

三年四月趙至道奏郡縣之官不許勢要合納官物蓋勢要之家不輸戶內常賦守倖增數解發倍償折納分差巡尉下鄉催擾並論以違制豪戶不即改正隱寄之產爲人首告如條科制從之 紹定二年詔民間二稅合輸本色不許抑令折納倍數取贏令臺諫監司覺察三年四月水災詔蠲紹興府餘杭上虞縣民戶折麥一年 端平元年三月詔戶部下諸路州縣九二稅折科令官民戶一體施行 嘉熙三年八月以楮輕詔戶部下諸路州軍應稅賦征權其一半見錢聽民間以全會折納嚴戢欺抑等弊令監司御史臺察其違者勅之

淳祐元年十月詔提舉司毋得以常平折變侵移其
義倉另項椿收仍措置上于尚書省 四年四月詔兩
浙酒司下屬部郡邑將今年夏稅折帛之半令民間以
楮幣准錢供輸 上又曰謝奕化折納苗米價太重已
戒飭之仍俟義倉充軍費以免科糴庶可少寬民力
景定三年十月詔蠲諸路州縣折納苗幣不許陽減陰
取違坐紹興條例

度宗咸淳三年六月林司諫奏乞申明推排之令以正州
縣之賦仍自今年苗稅嚴禁折納以儲軍餉別糴以備
賑濟從之 七年八月檢正權侍郎劉良貴上進故事
令諸路告稔去歲收成正州郡開場受納之時乞申飭

州縣寬折納之今庶幾兵食足國之元氣不虧上令戶部照所奏事理遍牒諸路州軍遵守施行

遼

聖宗統和中耶律抹只爲開遠軍節度使故事民歲輸稅斗粟折錢五銖抹只表請折錢六部民便之統和六年八月耶律抹只爲大同軍節度使奏今年民苦旱傷所納三司稅錢請增價折粟以利貧民從之

金

世宗時叅知政事梁肅上奏曰方今斗米三百人已困餓以錢難得故也計天下歲入二千萬貫以上一歲之用餘千萬院務場坊及百姓合納錢者通減數百萬院務

場坊可折納穀帛折支官兵俸給使錢布散民間稍稍
易得上曰懸欠院務許折納可也 二十年三月詔諸
稅粟非閭閻墾之地者除當儲數外聽民從便折納
二十九年六月時章宗已即位命農民於錢慳之郡所納錢貨
許折粟帛

章宗明昌元年三月初當軍人隨地所產納租其自欲折
錢輸納者從民所欲舊制夏秋稅納麥粟草三色以各
處之物不一戶部復令以諸所用物折納上封事者言
其不可戶部謂如此則諸路所輸之物要當和市轉擾
民矣遂命太府監應折納之物爲祇承官禁者及治黃
河芻薪增直二錢折納如黃河岸所用木石固非土產

乃令所屬計置而罷他應折納者

元

世祖中統二年遠倉之糧命止于沿河近倉輸納每石帶收腳錢中統鈔三錢或民戶赴河倉輸納者每石折輸輕賁中統鈔七錢至元十六年梁魯除知南陽府南陽在宋末爲邊鄙桑柘未成而歲賦絲民甚苦之曾請折輸布民便之十九年用姚元之請命江南稅糧依宋舊例折輸綿絹雜物又用耿左丞言令輸米三之一餘並入鈔以折定雲南賦稅用金爲則以貝子折納金一錢直貝子一索

成宗元貞二年命秋稅止輸租夏稅則輸以木綿布絹等

物所輸之數視糧以爲差折輸之物視時估之高下以爲直 是年忻都沙爲瑞州達魯花赤行省行諸路起徵夏稅亟召僚屬耆老議僉言袁州等路每田一畝徵糧四升惟本路獨用宋制所徵實倍他郡而官降斛斗又大三之一若以所餘折作夏稅有贏沙上議得免大德十一年九月江浙饑中書省臣言兩淮漕河淤塞官議䟽濬鹽一引帶收鈔二貫爲傭費計鈔二萬八千錠今河流已通宜移以賑饑民 十一月中書省臣言前爲江南大水以茶鹽課折收米賑饑民今商人輸米中鹽以致米價騰湧百姓雖獲小利終爲無益臣等議茶鹽之課當如舊從之

皇明

太祖洪武十八年令兩浙及京畿官田凡折收稅糧鈔每五貫准米一石絹每疋准米一石二斗金每兩准米十石銀每兩准米二石綿布每疋准米一石苧布每疋准米七斗夏稅農桑絲每十八兩准絹一疋重十八兩三十年更定鈔三貫五百文折米一石金每兩准米二十石銀每兩准米四石綿花一斤准米二斗

成祖永樂十一年令各處折徵糧金每兩准米三十石闊白綿布每疋准米一石五斗

宣宗宣德四年令應天蘇松并浙江屬縣等處遠年拖欠稅糧每絹一疋准米一石二斗綿布一疋絲一斤鈔五

十貫各准一石苧布一疋准七斗綿花一斤准二斗
五年令自三年以前拖欠稅糧以十分爲率三分折布
三分折絹四折鈔其布絹不拘長闊俱准照時價折
收 又令各布政司折徵糧布或買辦物料等項以總
數派府斟酌州縣里分道路分派務令輕重適均

英宗正統元年令浙江江西湖廣三布政司直隸蘇松等
府縣該起運南京糧米願納折色者折納布絹銀兩廣
東廣西福建三布政司折色稅糧布疋願納銀兩者每
米麥一石折銀二錢五分解京折給軍官俸糧 七年
令南直隸各府州縣夏稅農桑絹疋願納折色者每疋
折銀五錢解京准作軍官俸糧 又令廣西布政司土

官衙門不通河道去處歲徵糧米折收銀兩通類解京
八年令廣東福建二布政司查勘各處倉糧扣筭常
存本處官軍俸糧三年沿海衛所五年餘剩之數每米
一石折銀二錢五分解京發各邊折給俸糧及糴糧備
用 九年令浙江等布政司直隸蘇松等府所屬夏稅
麥少去處准令抵斗納米若本處有三年之積其存留
之數每石折徵鈔一百貫 又令廣西布政司各府州
縣稅糧自正統十年以後每歲以四萬石折徵銀兩解
京其餘存留本處備用

景皇帝景泰五年令山東折徵起運京庫綿花十斤堆米
一石

英宗天順二年令湖廣長沙府四糧自景泰七年爲始實徵內每歲以二十萬石折徵綿布二十萬疋一半解送京庫交納一半存留本司府備用 十年令浙江嚴州府建德等縣夏稅農桑二絹每疋折納銀六錢 十一年令大同宣府遼寧年坐到山西河南山東北直隸糧料除山西每石徵銀八錢外其河南等處自今年爲始每糧一石徵銀八錢五分

武宗正德三年令山東濟南府濱州活讎官民田土一千二百七十八頃四十畝八分四厘二毫辦納存留以足常賦其餘死讎官民田土折納布鈔以寬民力

世宗嘉靖元年令各該衙門將官軍人等每年九月分俸

糧除錦衣等七十二衛軍匠人役原舊關支折色外其
在京各衛所并各監局等衙門官吏旗軍人等正月至
七月俱照舊放支本色八月至十二月係收成積聚之
時每季終支與一個月折色價銀候兌軍折銀將盡每
年照舊全放本色 議准古北口倉糧缺乏該邊官軍
除折色照舊四錢五分外如遇放本色月分即於四錢
五分加銀二錢聽其自買候夏秋收成價值稍平仍召
商糴買米麥務足半年支用 又議准將易州鎮該管
十倉口衛所官吏旗軍應支月糧本折間月關支折色
仍照前例每石折銀四錢五分本色聽委官召買支用
二年議准淮安等衛所官軍月糧將兩淮運司見貯

餘鹽銀內量支三萬兩淮揚二處鈔關船料再准折銀
一年約穀銀三萬餘兩通融酌補仍行巡撫南直隸河
南都御史將所屬府州縣原坐派鳳陽及徐淮等倉各
年未解米麥州縣催徵每石量准折銀七錢解赴各倉
接濟其淮揚二處鈔關船料至四年以後仍舊兼支錢
鈔解京 七年題准薊倉海運糧米折放西路官軍月
糧各省解到月糧貯各關營以脩緊急其海運民納折
色銀兩通融放支東中二路官軍月糧照在邊者本色
月分每石給銀五錢五分折色月分每石給銀四錢五
分在衛者不拘時月每石給銀四錢 八年議准各
王府總小旗校尉軍匠厨役樂舞生獸醫樂戶樂工并

紀錄幼疾軍校等項月米除三斗原支本色并折色各
一半者俱照舊外其全支本色并三七四六二八本折
兼支者俱要本折色對半支給永爲例 十年題各邊
軍士月糧除常歲各照舊例折放外若年荒米貴將各
倉庫收貯并各該民屯應徵糧料分別本折色及軍士
月支數目通查奏請議處 十五年題福興漳泉四府
福州左等衛萬安等所旗軍月糧折色鈔銀將各府州
縣官吏支剩鹽鈔商稅魚課等銀通融放支 十七年
題各邊官軍該關折色月分不必拘定六錢之例務隨
時損益以濟貧軍其該關本色月分如在倉糧米數少
照依時估放銀兩三個月存留倉糧以備客兵支用

二十一年令保定官軍移守關隘者照見在常守軍士均給月糧一石本折兼支 二十三年議陝西蘭靖所新兵尚在腹裡與極邊不同月糧每石定銀六錢俱于正月內具數奏發 又題將宣鎮官軍月糧俱照先年事例旗軍放支本色月分有家小者給與本色八斗隻身六斗餘糧及該支折色月分照舊折支至於征操馬匹俱給本色全料 又題官軍月糧春夏給以本色秋冬給以折色馬匹料草春季本色冬季折色爲定例 三十四年議大同鎮所選夜不收二千二百餘名選留二千名准令每月除倉糧一石外增小糧二斗照折色事例支給 將真保二府折色糧改徵本色運赴陸恭

新城浮圖峪等倉專備馬水口防守軍士上半年每月支本色糧六斗折色四斗照例折銀二錢六分下半年每石仍折銀四錢五分 大同鎮官軍月糧除雜差本折照舊征哨官軍自正月至六月各月加本色米二斗并舊有本色三斗共五斗 三十六年議准宣府鎮南山隘口東路召募礦兵二千名每日給米一升五合就于原備防秋客兵糧內支用仍每日量加鹽菜銀一分亦就折支銀內動支至防秋畢日住支 三十七年題保定軍士月糧每年大月該本色六斗舊例每斗折給銀七分折色四斗舊例共銀二錢六分今本鎮米貴大月本色每斗量加折銀一錢連折色米共給銀八錢六

分夏冬爲小月照舊折支銀四錢五分 鎮邊等三城
軍糧照古北口例上半年本折間支下半年折色如遇
米貴量題加給 三十八年議准薊州密雲昌平主兵
月糧不拘常例本折隨宜支放穀貴則給本色穀賤則
給折色防秋之日將冬季馬料借支一月石門寨等區
赴薊昌關糧路遠不便全改折色 三十九年題遼東
寧前二衛主兵增添本色三個月發銀管糧官過關買
運收貯支給其二衛新設遊兵一千五員名行糧照主
兵支給每石二錢五分如遇米貴加銀二錢 四川松
潘小河二衛所見在軍士月糧除總旗月支一石小旗
九斗并紀錄幼軍各支三斗照舊外其餘軍士有妻者

俱支本色米八斗折色二斗無妻者支米五斗不許擅
行增減中間如有老弱不堪操備者悉行查革犯徒罪
以上者方許扣糧 四十年議薊州鎮新舊家丁千名
每名月糧一石一歲通給本色延綏大同五營挑練軍
一千五百名遼保軍二千名挑選標軍一千五百名各
月糧俱照舊本折兼支其合營標兵六千名行糧查照
地里遠近應給全支半支各准給本色 四十二年議
燕石二區軍士月糧薊州郎中隔遠不便管理改令永
平原設管糧通判專管兵備督理仍聽薊州郎中稽查
將來平府州縣及赤洋令口等衛分額徵錢糧儘數給
散二區并山海等衛官軍其不敷銀米聽薊州郎中將

山東河南北直隸民運折色扣給原該發二區漕運糧
全留薊倉就近給軍 薊遼各鎮官軍月糧不必拘上
半年本色下半年折色之例先儘見在糧米給散不足
盡改折色其折色亦不必更拘上半年折價六錢六分
之例止照各處時估定價支散 通州叅將營兵原係
抵補山東民兵之數月糧除每月原支八斗外每年仍
將山東解到民兵工食動支三千兩每軍各給一兩作
每月增糧二斗之數未爲定額 永平添註郎中總理
糧儲將燕石二區官軍月糧仍照舊例上半年通給折
色如該給本色月分遇年豐米賤軍士願照時估給支
折色者聽或年荒米貴先儘本色不敷照依上半年折

色例在邊每石六錢五分在衛每石四錢 四十四年
題准燕石二區軍士上半年月糧年豐在邊每石折銀
四錢五分在衛折銀四錢五分及行馬太二區一體施
行 鎮武西平西與西寧四堡邊軍月糧上半年支本
色鹽糧內給放下半年折色京運銀內支給

穆宗隆慶二年題准昌平鎮永輦昌標四營軍士月糧春
防有警就昌平居庸二倉關支無警同夏冬二季赴京
倉關領其薊州等鎮月糧酌量豐歉米貴給以本色米
賤給以折色通筭一軍一年不失本折各半成規三屯
營太平寨路遠地方務要多買米石就近給放 三河
守備下城操舍餘見在守城操備每名每月支糧六十

隨興營二衛造冊送通州關支每年冬亦准支冬衣布
二疋折銀五錢綿花一斤八兩折銀九分 薊州等鎮
主兵月糧每歲除下半年照舊折色外上半年本折各
三個月其折色價銀不拘在邊陸錢五分在衛四錢之
例隨歲豐歉估給如遇有閏照此扣散地方寫遠者給
折色八分本色二分至於客兵除緊急關支本色外若
無調遣亦照前例支給 各邊營管事官員糧俸俱在
原衛造支不許隨營隨路關支但各官身處邊關者折
價照在邊例支給其標下存操募軍軍糧布花查原係
某鎮項下者即各另自造冊赴本管兵備道掛號送管
糧郎中坐支不許仍前借名代造 大同鎮一等真夷

除正糧外每名每月准給米五斗另給銀三錢次等通
丁每名每月止准給糧五斗以上本折俱照例兼支
又將興州薊州營州各衛月糧原在通倉者并折俸布
花料草俱赴彼坐支原在密倉者造冊赴兵備道查明
轉送該鎮管糧衙門坐支其應支錢糧與應扣補各鎮
錢糧候五年終會計歸併

今上萬曆三年題將山西鎮東路盤道梁堡等四堡軍每
名原支月糧八斗再加二斗共折銀六錢三分新改撥
步軍每名原支月糧八斗再加一斗于主兵外故數內
支給 四年題將興州中後二屯衛官軍俸糧布花料
且俱改密雲鎮關支月糧上半年本色四個月該鎮支

給折色二個月每石六錢五分下半年俱支折色每石
四錢五分并俸布料銀每年同年例類發 七年題四
月十月俱係軍士開操之日赴通倉關米有誤隨營查
將通關應放本色六月十一月俱改坐京倉四月十月
仍給折色如遇米貴則停止折色改放本色臨時酌行
題請 九年題遼東兩河防守軍月糧每名每月原給
銀二錢五分今再加銀一錢五分 二十四年戶部奏
覆直隸巡按秦懋義應天巡撫趙可懷題稱蘇松常鎮
四府旱潦交加今秋七月以後八月望前颶風暴雨決
旬不止低鄉禾稻被淹於水高鄉花豆被損於風將蘇
松四府正改每石徵銀五錢以後原照題徵解至於四

府帶徵各年錢糧除金花漕折 內庫本色絹布等項
逐年帶徵 十一月戶部奏浙江巡按御史唐一鵬巡
撫劉元霖題報杭嘉湖府屬先經亢旱繼多霪雨且值
暴風時作稻穗搖落兼之海波泛溢田壤淹沒其屬興
等之災似應寬恤將被災九分烏程至嘉善等六縣被
災八分安吉至錢塘等六州縣漕糧准改五分每石折
銀五錢被災七分海鹽至桐鄉等四縣被災六分富陽
至新城等三縣被災五分海寧至昌化等四縣漕糧准
改三分每石折銀六錢連席板耗腳輕賚在內其改項
下行糧亦准免徵湖州府所屬本年屯糧每石折銀三
錢抵石納軍至於被災九分歸安烏程長興秀水等四

縣南糧俱准改折五分被災七分海鹽平湖崇德桐鄉等四縣被災六分富陽餘杭二縣被災五分海寧臨安二縣南糧俱准折三分以上改折之數每石折銀五錢與同本色一齊徵解南京戶部查收其寧波府被災八分本年見徵本色軍儲照災分數改折每石徵銀五錢抵充各軍月糧所據各府屬帶徵錢糧除袍服價銀與金花兵餉絲綿絹疋仍舊帶徵其餘暫緩一年俟明歲秋成照數徵解

畸零附餘

宋理宗紹定四年十二月臣寮奏乞嚴飭州縣科糴及人戶投糴不即給錢多取斛面之弊其州縣折苗並依祖

宗成法止以下戶畸零減直折錢違者奏劾重寘憲典
從之 嘉熙三年五月吏部郎中侯子震進對詔蠲端
平三年民畸零租 景定四年都省言已蒙恩霽例蠲
前三年逋賦而州縣往往有已催在官吏幹隱匿在已
者其實百姓不霑毫髮之惠漢史有除明年田租之令
最爲得宜今倣而行之庶實惠及民乞下諸路州縣蠲
前三年逋賦外更預將景定五年畸零稅色與免半輸
載爲赦條仍令各路漕司榜諭從之

皇明

英宗天順七年令浙江等布政司直隸松江等府折納稅
糧銀兩附餘之數造冊送部備照

孝宗弘治三年奏准凡查盤倉糧正糧勾數積有附餘照數作正支銷若耗糧不足計其守支久近准除折耗守支三年以上者每石追耗糧一升三年以下升半全無耗糧者查究問罪 十四年奏准各邊查盤糧料照例每石一年開折一升各以守支年分扣筭遞減其餘已經查盤正糧放支盡絕者積有耗糧附餘就令經手人員即便作正放支如有虧欠一并究治若正耗之外又有積出附餘一體作正支銷